



*Svjesna ograničenja vlastitih mogućnosti u sadašnjim okolnostima u kojima se nalazi Bosna i Hercegovina, redakcija časopisa "Bosniaca", kojeg izdaje Nacionalna i univerzitetska biblioteka BiH, u ovom broju pružila je priliku nekolicini arhitekata, naučnih i kulturnih radnika, pa i političara, da daju svoje viđenje nastavka obnove i buduće namjene objekta Vijećnice.*

*Poznato je da je od 50-tih godina u ovom objektu, jednom od najznačajnijih arhitektonskih spomenika Sarajeva, bila smještena Biblioteka, koja je 25./26. avgusta 1992. godine, bila skoro u potpunosti uništena.*

*Podršku obnovi Vijećnice, još tokom trajanja agresije, pored domaće javnosti, dao je i UNESCO u posebnoj Rezoluciji Generalne konferencije, usvojenoj na 28. plenarnoj sjednici, održanoj u Parizu 13. novembra 1993. godine.*

*Posebno treba ukazati na nastojanja i pomoć koju je za obnovu Vijećnice inicijalno dala austrijska Vlada, a nastavila i danas to čini Evropska komisija putem svog predstavništva u Bosni i Hercegovini, uz nadu da će se ovim aktivnostima pridružiti i Savjet Evrope, čiji je član odnedavno i Bosna i Hercegovina..*

*Trenutno se nalazimo u situaciji kada je neizvjesno da li će se nakon sadašnje faze radova nastaviti obnova Vijećnice, pa je zbog toga potrebno da i djelatnici Nacionalne i univerzitetske biblioteke BiH, kao i šira politička i kulturna javnost Bosne i Hercegovine, iznesu svoj stav o nastavku obnove i budućoj namjeni Vijećnice.*

*Iz tekstova koje objavljujemo proističe da se svi autori zalažu za ubrzan nastavak obnove Vijećnice, uz potrebu daleko većeg učešća domaćih vlasti. Što se njene namjene tiče, među opredjeljenjima se ističu sugestije da to ponovo bude ili Biblioteka, ili muzej, ili gradska kuća. Također je većina autora saglasna da je, ukoliko buduća namjena Vijećnice bude promijenjena, nužno izgraditi novu zgradu Nacionalne i univerzitetske biblioteke BiH.*

**Glavni urednik**

